

U ovom broju, između ostalog, čitajte:

- **Nova usluga Udruženja poslodavaca—web stranica za pružanje besplatne pravne pomoći**
- **Potpisan Kolektivni ugovori za djelatnost građevinarstva i Kolektivni ugovor za djelatnost drvne i papirne industrije**
- **UPFBiH: Pravilnik o fiskalizaciji hitno staviti van snage, u FBiH uvesti softversku fiskalizaciju**
- **Novo sjedište Udruženja poslodavaca FBiH**
- **Na inicijativu UPFBiH JP Autoceste FBiH će za 15 dana dostaviti prijedlog novih načina plaćanja koji bi trebali rezultirati nižom cijenom cestarine**
- **Održani odvojeni sastanci pregovaračkih timova UPFBiH za djelatnost hemije i nemetala, djelatnost saobraćaja, te za djelatnost trgovine**
- **Konačno usvojeni zahtjevi UPFBiH i deblokiran rad Komisije za vrijednosne papire**
- **Održana Skupština Grupacije poslodavaca ZDK pri UPFBiH**



Nova usluga Udruženja poslodavaca—web stranica za pružanje besplatne pravne pomoći

Na pitanja poslodavaca vezane za različite oblasti poslovanja odgovarat će ekspertni tim UPFBiH, sastavljen od vrhunskih stručnjaka u najkraćem mogućem roku

Udruženje poslodavaca Federaciji BiH je u okviru redovnih aktivnosti, a prvenstveno sa ciljem da olakša poslovanje članicama i unaprijedi kvalitet usluge pokrenulo novu web stranicu „Pravna pomoć“ u ponedjeljak, 6. septembra 2021. godine.

„Činjenica je da je među našim članicama, ali i u cijeloj FBiH više od 85 posto čine male kompanije, od jednog do deset zaposlenih, koje uglavnom nemaju pravne službe, odnosno, angažirane pravnike, pokrenuli smo web stranicu „Pravna pomoć“ na kojoj poslodavci mogu dobiti besplatnu pravnu pomoć. Na pitanja poslodavaca vezanih za različite oblasti poslovanja (radno i socijalno pravo, zdravstvena zaštita i zaštita na radu, finansije i ekonomija, građansko pravo, privredno pravo, ustavno pravo, krivično pravo, upravno pravo itd.) odgovarat će ekspertni tim UPFBiH, sastavljen od vrhunskih stručnjaka u najkraćem mogućem roku. Na taj način ćemo pomagati poslodavcima u otklanjanju mogućih dilema za neometano poslovanje. Odgovori na pitanja bit će dostavljani putem maila, nakon što ispune kratki obrazac koji je postavljen na stranici. Stranica nudi i mogućnost pregleda prethodno postavljenih pitanja i odgovora odgovora dostavljenih kompanijama koje su pitanja postavile“, kazao je direktor UPFBiH Mladen Pandurević.



Naglasio je da će na web stranici „Pravna pomoć“, poslodavci imati uvid u sve zakonske i podzakonske akte, kao i komentare, mišljenje i analize eminentnih stručnjaka sa kojima UPFBiH saraduje. Stranica će biti interaktivna, na način da je poslodavcima omogućeno direktno postavljanje pitanja i dobivanje odgovora u realnom vremenu. Također je u okviru stranice predviđen i forum u okviru kojega će poslodavci moći razmjenjivati iskustva i mišljenja o određenim pravnim pitanjima, a stanica ima chat u okviru kojega se mogu postavljati pitanja, dobivati odgovori i sl.



„Svaka članica se, putem stranice, može na brz, jednostavan i pristupačan način upoznati sa najbitnijim pravnim normama vezanim za poslovanje i primjenjivati ih u poslovnoj praksi. Stranica nudi i kraće informacije o izmjenama i dopunama zakonskih i podzakonskih akata kako bi poslodavci uvijek

bili upoznati o promjenama u zakonodavstvu i prilagodili svoje poslovanje novim odredbama. Osim toga, web stranica 'Pravna pomoć' pruža i pregled sudske prakse, presude sudova sa svih nivoa vlasti, koje su od značaja za poslodavce, kao i obrasce za izradu tužbi, žalbi, rješenja. Na web stranici će biti dostupan pregled kolektivnih ugovora, međunarodnih propisa vezanih za oblast poslovanja itd", rekao je Pandurević.

Za članice UPFBiH, ali i druge kompanije korištenje web stranice „Pravna pomoć" i svih njezinih pogodnosti je besplatno u prvih 12 mjeseci rada stranice. Nakon toga će pristup stranici biti omogućen svim članicama koje su platile članarinu, dok će druge kompanije moći pristupiti stranici plaćanjem simbolične naknade.

Više informacija o stranici na linku www.upfbihpravnapomoc.ba.

Promotivni video na linku [OVDJE](#).

Udruženje poslodavaca FBiH i Sindikat građevinarstva i industrije građevinskog materijala FBiH potpisali Kolektivni ugovor: Najniža satnica 3.25 KM neto

Utvrđene i ostale naknade radnicima



Predsjednik Pregovaračkog tima Udruženja poslodavaca Federacije Bosne i Hercegovine/ Grupacije poslodavaca za djelatnost građevinarstva pri UPFBiH Džemal Hasković i predsjednik Sindikata građevinarstva i industrije građevinskog materijala Federacije BiH Murat Škamo potpisali su Kolektivni ugovor o pravima i obavezama poslodavaca i radnika za djelatnost građevinarstva u FBiH.

Potpisanim Kolektivnim ugovorom definirana je najniža satnica koja sada iznosi 3,25 KM neto, dok će minimalna plaća iznositi između 650 i 670 KM plus topli obrok, prevoz i druga davanja.

„Ovaj kolektivni ugovor za djelatnost građevinarstva rezultat je visokog stepena saglasnosti koji smo imali sa predstavnicima Sindikata tokom pregovora. Rezultat je maksimalnih napora poslodavaca i sindikata. Svi zajedno očekujemo da i nadležne institucije vlasti daju svoj



doprinos povećanju minimalne plaće na način da smanje opterećenja na rad na maksimalno 30 posto, donesu odredbe o Zakonu o porezu na dobiti kojim će se reinvestiranje osloboditi plaćanja poreza na dobit te smanje i ukinu brojne parafiskalne namete koje su poslodavci obavezni plaćati", kazao je Hasković.

Škamo je naglasio značaj potpisivanja Kolektivnog ugovora za građevinsku djelatnost u FBiH, tim prije što je ovo prvi ugovor koji se potpisuje nakon 20 godina.

„Osim dogovorene satnice koja sada iznosi 3.25 KM neto, utvrđeni su i dodaci na plaću i to za prekovremeni rad najmanje 20 posto od neto satnice, noćni rad najmanje 25 posto od neto satnice, rad na dan sedmičnog odmora najmanje 30 posto od neto satnice te rad u dane praznika koji su po zakonu neradni najmanje 50 posto od neto satnice", rekao je Škamo.

Direktor UPFBiH Mladen Pandurević izrazio je u ime UPFBiH iznenađenje reakcijama rukovodstva Saveza samostalnih sindikata BiH u vezi sa određivanjem minimalne plaće.



„Potpuno nam je nejasno ponašanje rukovodstva, čiji članovi danas potpisuju kolektivne ugovore, a već sutra izlaze sa novim, povećanim zahtjevima. Ne želimo da se teško uspostavljeno povjerenje poljulja te ih pozivamo da nastavimo saradnju u obostranom interesu", kazao je Pandurević.



Kolektivni ugovor zaključen je na period od godinu dana. Potpisanim Kolektivnim ugovorom reguliraju se pitanja iz radnih odnosa i u vezi sa radnim odnosima, važenje Kolektivnog ugovora, način utvrđivanja plaće i naknada plaće, utvrđivanje najniže satnice i niže od najniže satnice, način i

visina obračuna povećanja plaće po osnovu otežanih uslova rada, naknada plaće u slučaju smrti radnika i člana uže porodice, za vrijeme odsustva sa rada, za vrijeme bolesti radnika i u vrijeme rada na terenu.

Također se reguliraju i način i visina utvrđivanja naknade za službena putovanja, uslove i visina naknade plaće zbog odsustva sa radnog mjesta žene za vrijeme trudnoće u slučaju kad ne može biti raspoređena na druge poslove, pravo na otpremninu, uslovi za rad sindikata, postupak kolektivnog pregovaranja i



načina mirnog rješavanja kolektivnih radnih sporova, postupak kolektivnog pregovaranja, zaključivanja i otkazivanja kolektivnog ugovora te drugih pitanja od značaja za uređivanje odnosa između poslodavaca i radnika koja nisu ili nisu u cijelosti uređena Zakonom o radu i drugim propisima, odnosno, pitanja za koja je Zakon predvidio da će biti uređena kolektivnim ugovorom.



Potpisani Kolektivni ugovor će se početi primjenjivati dan nakon objavljivanja u Službenim novinama.

Od početka augusta potpisani su kolektivni ugovori o pravima i obavezama poslodavaca i radnika za djelatnost proizvodnje i prerade metala u Federaciji BiH i za djelatnost drvne i paprne industrije, a planirano je da se

u narednih dvadesetak dana potpišu i ostali kolektivni ugovori između UPFBiH i sindikata iz realnog sektora.

Novo sjedište Udruženja poslodavaca Federacije BiH



Moderan i funkcionalan, novi poslovni prostor Udruženja poslodavaca Federacije BiH nalazi se na prvom spratu zgrade u ulici Maršala Tita broj 6.

Površina prostora je oko 160 m² te će zadovoljiti sve iskazane potrebe Udruženja poslodavaca FBiH.

Izuzev kancelarijskog prostora, dvije velike multifunkcionalne sale omogućit će organizovanje edukacija i treninga, u sklopu Edukacionog centra Udruženja poslodavaca FBiH, konferencija, seminara, okruglih stolova, press-konferencija, sastanaka i drugo.

Prelaskom u novi poslovni prostor stvaraju se mogućnosti za dalji razvoj i nove aktivnosti Udruženja poslodavaca FBiH.

Udruženje poslodavaca FBiH i Samostalni sindikat šumarstva, prerade drveta i papira BiH potpisali Kolektivni ugovor: Najniža satnica 2.90 KM neto

Plaća povećana za 25 posto u odnosu na raniju



Suhad Ećo, u ime Udruženja poslodavaca Federacije Bosne i Hercegovine/Grupacije poslodavaca za djelatnost drvne i papirne industrije i Lejla Ćatić, predsjednica Samostalnog sindikata šumarstva, prerade drveta i papira BiH potpisali su Kolektivni ugovor o pravima i obavezama poslodavaca i radnika za djelatnost drvne i papirne industrije u Federaciji BiH. Potpisanim Kolektivnim ugovorom definirana je najniža satnica koja sada iznosi 2.90 KM neto.

„Dogovorena satnica je veća 25,5 posto u odnosu na prethodni kolektivni ugovor, a članice UPFBiH iz sektora šumarstva, prerade drveta i papira potvrdile su svoje društveno odgovorno poslovanje pristajući na značajno povećanje plaća. Prema upravo potpisanom Kolektivnom ugovor najniža osnovna plaća za prosječan fond sati od 176 u sektoru prerade drveta i papira iznosi 510 KM, a sa naknadama za topli obrok, prijevoz i regres ukupna najniža primanja u ovom sektoru će biti između 750 i 800 KM. Ovo je maksimum opterećenja koje poslodavci mogu podnijeti kada je u pitanju najniža plaća. Za značajnija povećanja nužno je znatno smanjiti doprinose i poreze na plaće koji su u ovom trenutku najviši u Europi. Još jednom

pozivamo predstavnike izvršne i zakonodavne vlasti u FBiH da usvoje Zakon o doprinosima koji neće biti veći od 30 posto, Zakon o porezu na dobit kojim se reinvestiranje oslobađa od plaćanja poreza na dobit i Zakon o porezu na dohodak FBiH. Na taj način će se stvoriti prostor za značajnije povećanje najnižih plaća u FBiH", kazao je Ećo nakon potpisivanja Kolektivnog ugovora.

Lejla Ćatić je istaknula da je za radnike u ovom sektoru potpisivanje Kolektivnog ugovora od izuzetne važnosti.

„Sektor drvne i papirne industrije ima veliki broj kompanija i zaposlenih, a plaće radnika su dosta niske. U Federaciji BiH ne postoji propis kojim se utvrđuje najniža plaća, odnosno minimum drugih materijalnih prava radnika, tako da Kolektivni ugovor kao izvor prava, predstavlja osnovni akt kojim se regulišu i štite prava i interesi radnika u ovakvim prilikama. Zakonom o radu radnici se uvode u određena prava, pravo na isplatu plaće, dodatke na plaću, naknade po raznim osnovama, pravo na godišnji odmor i dr. prava", kazala je Ćatić.



Kolektivni ugovor zaključen je na period od godinu dana. Istim je utvrđeno da se plaća radnika obračunava po satnici koja ne može biti niža od 2,90 KM neto, a koja je povećana za 25% u odnosu na raniju. Radnici u sektorima drvne i papirne industrije ostvaruju pravo na dodatke za minuli rad, prekovremni rad, noćni rad, rad na dane sedmičnog odmora, rad na dane praznika pravo na dodatak na plaću na otežane uvjete rada, pravo na topli obrok, prevoz te druge naknade koje su također povećane u odnosu na raniji Kolektivni ugovor, kao i pravo na godišnji odmor koji traje najmanje 21 dan sa mogućnošću uvećanja. Dodaci i naknade utvrđeni su u najnižem iznosu koji poslodavac mora poštovati. Na temelju ovog Kolektivnog ugovora sindikat i poslodavac na razini kompanije mogu zaključiti pojedinačni kolektivni ugovor

kojim će se utvrditi povoljnija prava zavisno od kompanije, djelatnosti kojom se bavi i broja uposlenih. Povoljnije pravo može se utvrditi i pravilnikom o radu i ugovorom o radu.

Potpisani Kolektivni ugovor će se početi primjenjivati dan nakon objavljivanja u Službenim novinama.

Početak augusta potpisan je i Kolektivni ugovor o pravima i obavezama poslodavaca i radnika za djelatnost proizvodnje i prerade metala u Federaciji BiH, a planirano je da se u narednih mjesec dana potpišu i ostali kolektivni ugovori između UPFBiH i sindikata iz realnog sektora.

[Kolektivni ugovor o pravima i obavezama poslodavaca i radnika za djelatnost drvne i papirne industrije u Federaciji BiH](#)

JP Autoceste FBiH će za 15 dana dostaviti prijedlog novih načina plaćanja, koji bi trebali rezultirati nižom cijenom cestarine



Javno preduzeće Autoceste Federacije Bosne i Hercegovine pripremit će u narednih 15 dana prijedlog za nove načine naplate cestarina na autocestama u Federaciji BiH koje bi trebale rezultirati manjim troškovima za cestarine za korištenje autocesta. To je rezultat sastanka kojeg su predstavnici Udruženja poslodavaca FBiH održali sa Denisom Lasićem,

ministrom prometa i komunikacija FBiH i njegovim saradnicima te Elvedinom Voloderom, v.d.



direktorom JP Autoceste Federacije BiH i njegovim saradnicima.

Također je dogovoreno da će se, nakon što JP Autoceste FBiH dostave prijedlog, organiziran novi sastanak na kojemu će se razgovarati o predloženim rješenjima.

Ovaj sastanak je rezultat inicijative koje je sredinom augusta pokrenulo Udruženje poslodavaca Federacije BiH u okviru koje je zatražen hitan sastanak sa ministrom prometa i komunikacija FBiH i v.d. direktora JP Autoceste FBiH s ciljem smanjenja cijene cestarine na autoputu za 20 do 25 posto u FBiH.

Na osnovu uporednopravne analize zakonodavstva zemalja iz okruženja i zemalja članica EU koju je uradilo UPFBiH, utvrđeno je da se u FBiH trenutno plaća znatno skuplja cestarina nego u zemljama okruženja i zemljama članicama EU.

UPFBiH: Pravilnik o fiskalizaciji hitno staviti van snage, u FBiH uvesti softversku fiskalizaciju

Udruženje poslodavaca Federacije Bosne i Hercegovine insistira da Ministarstvo finansija Federacije BiH hitno stavi van snage Pravilnik o zamjeni fiskalnih sistema u FBiH.

Predlažemo da se sačeka sa usvajanjem novog Zakona o fiskalizaciji Federacije BiH i tek nakon toga da se usvajaju adekvatni podzakonski akti, a da se Pravilnikom prejudiciraju rješenja iz novog Zakona o fiskalizaciji FBiH.

Primjena odredbi Pravilnika izazvala bi enormno povećanje troškova za kompanije iz oblasti maloprodaje i ugostiteljstva, ali i drugih djelatnosti u Federaciji BiH, koje već godinu i po dana snose ozbiljne ekonomske posljedice pandemije Covid-19. Nerazumljiva nam je namjera Ministarstva koje insistira na primjeni Pravilnika, pogotovo zbog činjenice da njegova primjena neće imati nikakav uticaj na priliv budžeta.

Šta više, sredstva od zamjene fiskalnih sistema će se prelići u džepove pojedinaca za koje postoje indicije da su interesno i politički povezani sa pojedinim strukturama vlasti.

Obrazloženja Ministarstva finansija FBiH, kojim opravdava uvođenje novih fiskalnih uređaja, da će se zamjenom fiskalnih sistema pojačati kontrola naplate javnih prihoda ne smatramo opravdanim. Ukoliko u Ministarstvo finansija FBiH ostaju pri svoje obrazloženju, onda se u budžetu FBiH moraju predvidjeti sredstva i snositi troškove zamjene fiskalnih sistema.




Prema navodima iz Ministarstva finansija FBiH, u ovome trenutku trebalo bi biti zamijenjeno oko 85.000 fiskalnih sistema, što iznosi oko 70 miliona KM, koje bi se preliće u džepove pojedinaca.

Ukoliko Ministarstvo finansija Federacije BiH ne stavi van snage Pravilnik, pozivamo nadležna tužilaštva i institucije i tijela koja se bave borbom protiv korupcije da, u skladu sa svojim ovlaštenjima, provjere navode pojedinih medija, da se prodajom fiskalnih sistema i prateće opreme bave pojedinci bliski vladajućim strukturama.

Udruženje poslodavaca Federacije Bosne i Hercegovine ostaje posvećeno poštivanju svih pozitivnih zakonskih propisa i poštovanju fiskalne discipline, ali ne na ovaj način.

Održani odvojeni sastanci pregovaračkih timova UPFBiH za djelatnost hemije i nemetala i za djelatnost saobraćaja



Pregovarački tim za djelatnost hemije i nemetala Udruženja poslodavaca Federacije Bosne i Hercegovine održao je 08. septembra 2021. godine sastanak s ciljem otpočinjanja pregovora za zaključivanje kolektivnog ugovora za ovu djelatnost.

Dogovoreno je da će se do naredne sedmice utvrditi konačan tekst Kolektivnog ugovora te da će dogovoriti dalje aktivnosti i dostavljanje istog Samostalnom sindikatu hemije i nemetala FBiH.

Prethodnog dana, održan je i sastanak pregovaračkog tima Udruženja poslodavaca FBiH za djelatnost saobraćaja na kojem je utvrđen tekst Kolektivnog ugovora o pravima i obavezama poslodavaca i radnika u oblasti prometa u Federaciji BiH te će isti biti upućen Sindikatu.

Ministarstvo zdravstva i socijalne politike SBK prihvatilo inicijativu UPFBiH za uvođenje procesa imunizacije u prostorijama kompanija



Udruženje poslodavca FBiH i Grupacija poslodavaca SBK pri UPFBiH uputili su Ministarstvu zdravstva i socijalne politike SBK inicijativu za uvođenje procesa imunizacije u prostorijama kompanija u tom kantonu.

Pomenuto ministarstvu je prihvatilo inicijativu, te obavijestilo Udruženje da će ostvariti komunikaciju sa nadležnim domom zdravlja.

Održan sastanak Pregovaračkog tima UPFBiH za vođenje pregovora za zaključivanje Kolektivnog ugovora za djelatnost trgovine

Sastanak Pregovaračkog tima za vođenje pregovora za zaključivanje Kolektivnog ugovora o pravima i obavezama poslodavaca i radnika za djelatnost trgovine u FBiH održan je online 02. septembra 2021. godine. Sastanak je održan u cilju



pripreme za otpočinjanje pregovora sa Sindikatom radnika trgovine i uslužnih djelatnosti BiH. Pregovarački tim je dogovorio dalje aktivnosti, te će se naredne sedmice uputiti poziv Sindikatu za otpočinjanje pregovora. Očekuje se da će Sindikat u dobroj vjeri pristupiti pregovorima, te da će Kolektivni ugovor za djelatnost trgovine biti uskoro potpisan.

Konačno usvojeni zahtjevi UPFBiH i deblokiran rad Komisije za vrijednosne papire FBiH

UPFBiH je dvije godine urgentno tražilo da se riješi ovo pitanje

U Službenim novinama FBiH 75/21 od 22.09.2021. godine objavljena je Odluka o potvrđivanju odluke o razrješenju i imenovanju članova Komisije za vrijednosne papire FBiH.

Udruženje poslodavaca FBiH je dvije godine, koliko je bio blokiran rad Komisije, urgentno tražilo da se riješi ovo pitanje i naglašavalo da je zbog nefunkcioniranja Komisije za vrijednosne papire FBiH blokirano više stotina miliona KM te da se uzrokuje višemilionska šteta privrednim subjektima, a naročito investitorima čija su ulaganja na čekanju.




Rad Komisije je odblokiran na sjednici Doma naroda Parlamenta FBiH, održane 09.09.2021. godine, kada je sa 32 glasa za odlučeno da raniji članovi budu razriješeni dužnosti i da se imenuju novi.

Za predsjednika Komisije imenovan je Adnan Zukić, zamjenik predsjednika je Matej Živković, a članovi su Predrag Mlađen, Esad Đelilović i Romeo Zelenika.

[Odluka o potvrđivanju odluke o razrješenju i imenovanju članova Komisije za vrijednosne papire FBiH](#)

Održan sastanak Stručnog tijela za izradu izmjena i dopuna Zakona o unutrašnjoj trgovini, Zakona o kontroli cijena i Zakona o hrani



Sastanak Stručnog tijela za izradu tekstova Zakona o izmjenama i dopunama Zakona o kontroli cijena, Zakona o izmjenama i dopunama Zakona o unutrašnjoj trgovini i Zakona o izmjenama i dopunama Zakona o hrani održan je 13.

septembra 2021. godine putem Zoom platforme. Stručno tijelo je formirano je u sklopu projekta "Poslovanje bez korupcije" koji implementira Udruženje poslodavaca FBiH, nakon što su predstavnici kompanija članica UPFBiH u okviru rada Fokus grupe dali svoja mišljenja i upute za izradu navedenih zakona.

Stručno tijelo sačinjavaju predstavnici Federalne uprave za inspekcijske poslove, Vlade Federacije BiH, Agencije za prevenciju korupcije i koordinaciju borbe protiv korupcije, Uprave za inspekcijske poslove ZHK, Kantonalne uprave za inspekcijske poslove Kantona Sarajevo, Saveza samostalnih sindikata BiH i Udruženja poslodavaca FBiH.

Zadatak Stručnog tijela je da analizira tekstove zakona koje je sačinio pravni tim UPFBiH u saradnji s vanjskim ekspertom, te da u cilju dobivanja konačnog teksta zakona da svoje mišljenje i prijedloge.

Na današnjem sastanku svi članovi Stručnog tijela iskazali su svoju punu podršku predloženim tekstovima zakona. Nakon održanih sastanaka Fokus grupe i Stručnog tijela, predstoje zagovaračke aktivnosti prema zakonodavnim vlastima kako bi se predloženi zakoni i usvojili i time smanjio prostor za korupciju s kojom se poslodavci susreću u svom poslovanju.

U toku finalne pripreme za slanje pune aplikacije za projekat "Podrška EU lokalnim partnerstvima za zapošljavanje – Faza II"

Projekt će doprinijeti povećanju zaposlenosti na području Grada Visoko i Općine Breza

U okviru finalnih priprema za slanje pune aplikacije za projekat "Podrška Europske unije lokalnim partnerstvima za zapošljavanje – Faza II" (LEP II) predstavnici Udruženja poslodavaca FBiH održali su radno-konsultativni sastanak s članovima Lokalnog partnerstva za inovativno i održivo zapošljavanje u drvnjoj industriji u srijedu 22.09.2021. u Viskom i Brezi.

Sastanak je održan sa načelnikom Općine Breza, šefom Odsjeka za privredu Grada Visoko, direktoricom Mješovite srednje škole "Mehmedalija Mak Dizdar" Breza i predstavnikom kompanije Wood Team. Pored direktora UPFBiH sastanku su prisustvovali i eksperti za strukovno obrazovanje prof.dr. Marijana Šećibović i prof.dr. Refik Šećibović.



Projekt će doprinijeti povećanju zaposlenosti na područjima Grada Visoko i Općine Breza, ali i okolnih općina, pružanjem podrške lokalnim partnerstvima u kreiranju i provedbi programa za aktivaciju i integraciju nezaposlenih osoba na tržište rada u skladu sa specifičnim potrebama poslodavaca iz sektora drvoprerade.

Razvoj lokalnih partnerstava za zapošljavanje se zasniva na učešću i aktivnom uključivanju šest


relevantnih aktera na tržištu rada, odnosno, Federalnog zavoda za zapošljavanje, Grada Visoko, Općine Breza, kompanije Wood Team, Mješovite srednje škole "Mehmedalija Mak Dizdar" Breza i Udruženja poslodavaca FBiH kao nosioca projekta.

ASA grupacija zahvalila UPFBiH na uloženom trudu za deblokiranje Komisije za vrijednosne papire

ASA grupacija uputila je [zahvalnicu](#) Udruženju poslodavaca FBiH za podršku poslovnoj zajednici i uloženom trudu za deblokiranje Komisije za vrijednosne papire.

neizmjereno Vam se zahvaljujemo za pruženu podršku privrednoj zajednici u protekle skoro dvije godine i trudu koji ste uložili, a kako bi danas sa ponosom mogli reći da imamo uspostavljenu Komisiju za vrijednosne papire FBiH, koja je ključna za dalji razvoj privredne zajednice. Jučerašnji dan za BiH predstavlja prekretnicu i svijetlo za dalju budućnost i ulaganje kako stranih, tako i domaćih investitora u našu BiH. Da zajedničkim snagama možemo više i ovo je dokaz, te se iskreno nadamo vašoj podršci i dalje, a kako bi zajedničkim snagama osnažili privredu i ekonomiju naše zemlje.

S poštovanjem,


Almir Jazvin, Direktor


Eldin Hadžiselimović, Izvršni direktor

"Neizmjereno Vam se zahvaljujemo za pruženu podršku poslovnoj zajednici u protekle skoro dvije godine i trudu koji ste uložili, a kako bismo danas s ponosom mogli reći da imamo uspostavljenu Komisiju za vrijednosne papire FBiH koja je ključna za dalji razvoj privredne zajednice. Da zajedničkim snagama možemo više i ovo je dokaz, te se iskreno nadamo vašoj podršci i dalje, a kako bi osnažili privredu i ekonomiju naše zemlje" navodi se u zahvalnici.

Udruženje poslodavaca FBiH je svojim aktivnostima i pritiscima na nadležnu instituciju, uticalo na deblokiranje Komisije koja će nakon dvije godine blokade, konačno, nastaviti sa radom.

Nova članica UPFBiH - Multiteh inženjering



Društvo "MULTITEH INŽENJERING" d.o.o. Zenica registrovano je 1990. godine, a pruža usluge zaštite na radu, zaštite od požara, zaštite okoliša, elektroenergetskih ispitivanja, termoenergetskih ispitivanja, projektovanja i konsaltinga, akreditovano tijelo za ispitivanje i certificiranje liftova, rudarstvo – Elektro ispitivanja, ispitivanja iz oblasti zaštite na radu, projektovanje, laboratorija.

Više o kompaniji Multiteh inženjering pročitajte na [njihovoj stranici](#).

Zahvalnica udruženja "Zajedno za naš grad" Mostar

Udruženje građana "Zajedno za naš grad" Mostar uputilo je [zahvalnicu](#) Udruženju poslodavaca FBiH na doniranom kancelarijskom namještaju.

"Zahvalni smo i obradovani što smo prepoznati od Vašeg eminentnog Udruženja koje je već doseglo zavidan nivo svojim radom i zalaganjem. Još jednom veliko hvala uz želju da se naša saradnja nastavi za opće dobro našeg društva", napisano je u zahvalnici.



Udruženje građana "Zajedno za naš grad" Mostar je humanitarna organizacija s misijom da poveže one koji mogu i žele pomoći sa onima kojima je pomoć potrebna u socijalnom, materijalnom ili edukativnom smislu.

UPFBiH je zbog preseljenja u nove prostorije, kancelarijski namještaj doniralo ovom udruženju.

Na sjednici UO Grupacije poslodavaca ZDK pri UPFBiH preciziran datum održavanja Skupštine



Sjednica Upravnog odbora Grupacije poslodavaca Zeničko-dobojskog kantona pri Udruženju poslodavaca FBiH održana je 09. septembra 2021. godine na kojoj se raspravljalo o prijedlozima za Skupštinu Grupacije koja će se održati 30. septembra tekuće godine.

Predsjednik Upravnog odbora Kasim Kotorić obrazložio je izvještaje o radu. Izvještaji su prihvaćeni uz napomenu da je iste potrebno dopuniti uz napomenu da je otežavajuća okolnost u radu Upravnog odbora bila osiguranje kvoruma, te da će članovi koji se nisu redovno odazivali na pozive za sjednice UO biti opozvani, a da će se imenovati novi koji će aktivno učestvovati u radu Upravnog odbora.

Istaknuto je da će se na Skupštini usmeno referisati finansijski izvještaji Grupacije, te da će se izabrati članovi Upravnog odbora, predsjednik i potpredsjednik Skupštine i imenovati stalni član Ekonomsko-socijalnog vijeća ZDK.

Održana Skupština Grupacije poslodavaca ZDK pri UPFBiH



Grupacije poslodavaca ZDK pri Udruženju poslodavaca FBiH održala je 30. septembra 2021. godine u Zenici redovnu izbornu-izvještajnu Skupštinu.

Za predsjednicu Skupštine izabrana je ponovno Alma Zaimović iz Kaknja, dok je Vladimir Franjić iz Zenice novi

potpredsjednik Skupštine Grupacije poslodavaca ZDK pri UPFBiH.

"U pandemijskoj godini mi smo izgubili saradnju s Vladom ZDK. Ne održavaju se redovito sjednice Ekonomsko-socijalnog vijeća, ne osjećamo se kao partner u vlasti i nameću nam se novi parafiskalni nameti na kantonalnom i federalnom nivou, koje mi ne možemo podnijeti" kazala je Zaimović, sumirajući najveće probleme u periodu od 2019. godine do danas.



Naglasila je da u narednom periodu Grupacije želi uspostaviti znatno bolju saradnju sa Vladom kantona te biti njen ravnopravan partner, jer privreda je ključni faktor u ovoj državi i kao takvi trebamo biti prepoznati.

"Poslodavci moraju biti partneri vlasti koja nas sada ne prihvata na taj način i radi šta hoće, pa i sredstva namijenjena za nas troši za popunjavanje rupa što mi ne smijemo dozvoliti" naglašava potpredsjednik Skupštine Vladimir Franjić.



UDRUŽENJE POSLODAVACA

UDRUŽENJE POSLODAVACA FBiH
MARŠALA TITA 6, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba